



N°7413  
Entrée le 22.12.2022  
Déclarée recevable  
Président de la Chambre des Députés  
(s.) Fernand Etgen  
Luxembourg, le 22.12.2022

Groupe parlementaire

Här Fernand Etgen

President vun der Deputéiertechamber

19, um Krautmaart

L-1728 Lëtzebuerg

Ministère de l'Ar de la Viticu et du Développe
Référence: 81728
23 DEC. 2022
A traiter par:

Lëtzebuerg, den 22. Dezember 2022

Här President,

esou wéi d'Chambersreglement et virgesäit, biede mir lech, dës parlamentaresch Fro un den Här Landwirtschaftsminister an un den Här Energieminister weiderzeleeden.


Zenter dem Joer 2019 enthält de Bensinn op de Lëtzebuenger Tankstellen en Undeel vun 10 Prozent u Bio-Ethanol. Och den Diesel ka mat Bio-Ethanol versat sinn. Fir d'Hierstelle vu Bio-Ethanol mussen awer landwirtschaftlech Fläche genotzt ginn.

Dëst ass am Kontext vun den Diskussiounen, datt Lëtzebuerg am Kader vun internationale Krise méi onofhängeg soll ginn, wat d'Produktioun vu Liewensmëttel ugeet, awer net onproblematesch, well d'Produktioun vu Liewensmëttel jo och flächenintensiv ass.


An deem Zesammenhang hätt mir folgend Froen un d'Regierung:

1. Ginn zu Lëtzebuerg scho landwirtschaftlech brauchbar Fläche genotzt, fir Bio-Ethanol hierzestellen? Wa jo, wéi vill Prozent vun de landwirtschaftlech brauchbare Fläche gi fir d'Hierstelle vu Bio-Ethanol genotzt?
2. Am Fall wou de Bio-Ethanol, deen zu Lëtzebuerg op den Tankstellen ugebuede gëtt, zumindest zum Deel och aus aneren Länner - sief dat europäesch Länner oder weltwäit - kënnt: Aus wéi enge Länner kënnt de Bio-Ethanol, deen eisem Kraaftstoff bäigemëscht ass? Wéi vill Prozent vun de landwirtschaftlech benotzbare Fläche ginn - opgeschlësselt no deene jeeeweilege Länner - fir d'Hierstelle vu Bio-Ethanol gebraucht?
3. Kann d'Regierung ausschléissen, datt an deene jeeeweilege Länner d'Notze vu landwirtschaftleche Fläche fir d'Hierstelle vu Bio-Ethanol net an engem ongesonde Mooss mat dem Notze vu landwirtschaftleche Fläche fir d'Hierstelle vu Liewensmëttel konkurréiert - well jo d'Ernierung vun der Bevëlkerung Prioritéit huet? Kann d'Regierung dëst fir all eenzelt Land, wat Bio-Ethanol produzéiert, deen och an d'Lëtzebuenger Versuergungskette kënnt, ausschléissen?
4. Kann d'Regierung ausschléissen, datt et an deene jeeeweilege Länner zu kengem Zäitpunkt zu enger disproportionéierter Deierecht vu Liewensmëttel duerch d'Hierstelle vu Bio-Ethanol kënnt, déi d'Ernierung vun der Bevëlkerung, besonnesch, wat déi Äermst an der Bevëlkerung ugeet, a Gefor bréngt? Kann d'Regierung dëst fir all eenzelt Land, wat Bio-Ethanol produzéiert, deen och an d'Lëtzebuenger Versuergungskette kënnt, ausschléissen?

Mat déiwem Respekt,

A handwritten signature in black ink, appearing to be 'JEFF ENGEL', written over a horizontal line.

Jeff Engelen  
Deputéierten

A handwritten signature in black ink, appearing to be 'FRED KEUP', written over a horizontal line.

Fred Keup  
Deputéierten



**Gemeinsam Äntwert vum Minister fir Energie, Claude Turmes, der Ministesch fir Ëmwelt, Klima an nohalteg Entwécklung, Joëlle Welfring, an dem Minister fir Landwirtschaft, Wäibau a ländlech Entwécklung, Claude Haagen, op d'parlamentaresch Fro n°7413 vum 22. Dezember 2022 vun den éierewäerten Deputéierte Jeff Engelen a Fred Keup iwwert "Bio-Ethanol"**

- 1. Ginn zu Lëtzebuerg scho landwirtschaftlech brauchbar Fläche genotzt, fir Bio-Ethanol hierzustellen? Wa jo, wéi vill Prozent vun de landwirtschaftlech brauchbare Fläche gi fir d'Hierstelle vu Bio-Ethanol genotzt?**

Aus der Äntwert op d'parlamentaresch Fro n°6504 vum 19. Juli 2022 vun den honorabelen Deputéierte Gusty Graas a Max Hahn geet ervir dass 1,7% vun de landwirtschaftlech brauchbare Fläche fir Energiekulture genotzt ginn a laut dem Service d'Économie Rurale awer keng Fläche fir den Ubau vu Bio-Ethanol fir den Transportsecteur.

- 2. Am Fall wou de Bio-Ethanol, deen zu Lëtzebuerg op den Tankstellen ugebuede gëtt, zumindest zum Deel och aus aneren Länner - sief dat europäesch Länner oder weltwäit - kënnt: Aus wéi enge Länner kënnt de Bio-Ethanol, deen eisem Kraaftstoff bäigemëscht ass? Wéi vill Prozent vun de landwirtschaftlech benotzbare Fläche ginn - opgeschlëselt no deene jeweilege Länner - fir d'Hierstelle vu Bio-Ethanol gebraucht?**

Am Joer 2021 goufen deem zu Lëtzebuerg verkaafte Bensinn 33 Milliounen Liter Bio-Ethanol bäigemëscht. D'Hierkonftslänner vun der Matière Première aus deem dësen hiergestallt gouf, sinn an der folgender Tabell opgelëscht:

Hierkonftsland vun der Biomass	Pourcentage vu Bio-Ethanol 2021
Belsch	61,37 %
Däitschland	6,96 %
Vereenegt Kinnékräich	6,80 %
Tschechien	4,62 %
USA	4,14 %
Frankräich	4,01 %
Ukrain	4,01 %
Rumänien	3,67 %
Bolivien	2,63 %
Kanada	0,86 %
Ungarn	0,67 %
Slovakei	0,62 %
Peru	0,20 %
Costa Rica	0,02 %
Bulgarien	0,02 %

D'Zuele sinn no de gängige Standarden opgeronnt ginn an erginn dowéinst liicht méi wéi 100%.

- 3. Kann d'Regierung ausschléissen, datt an deene jeeweilige Länner d'Notze vu landwirtschaftleche Fläche fir d'Hierstelle vu Bio-Ethanol net an engem ongesonde Mooss mat dem Notze vu landwirtschaftleche Fläche fir d'Hierstelle vu Liewensmëttel konkurréiert - well jo d'Ernierung vun der Bevëlkerung Prioritéit huet? Kann d'Regierung dëst fir all eenzelt Land, wat Bio-Ethanol produzéiert, deen och an d'Lëtzebuenger Versuergungskette kënnt, ausschléissen?**

An der Äntwert op d'parlamentaresch Fro n°6090 vum 22. Abrëll 2022 vun den honorabelen Deputéierten iwwert Biokraaftstoffer ass déi Thematik beliicht ginn. D'Direktiv 2018/2001/UE gesäit vir, dass Biokraaftstoffer aus der sougenannter éischer Generatioun, déi am Weesentleche fir den Zweck vun der Energieproduktioun op Agrarland ugebaut ginn, maximal 7% vum Endenergieverbrauch am Stroossen- a Schinneverkéier däerfen ausmaachen.

D'Regierung huet schonns am Dezember 2019 iwwert d'Accisegesetz festgehalen, dass den Undeel vun deene Biokraaftstoffer net méi wéi 5% däerf ausmaachen, dat ass also däitlech méi niddereg wéi den Undeel, dee vun der Direktiv virgesinn ass.

Wéi den Tableau uewendriwwer weist, kënnt den Haaptundeel vum Bio-Ethanol aus der europäescher Unioun, a fir dass de Bio-Ethanol kann ugerechent ginn, muss een d'Nohaltegkeetskrittären, déi an der Direktiv 2018/2001/UE definéiert sinn, erfëllen.

- 4. Kann d'Regierung ausschléissen, datt et an deene jeeweilige Länner zu kengem Zäitpunkt zu enger disproportionéierter Deierecht vu Liewensmëttel duerch d'Hierstelle vu Bio-Ethanol kënnt, déi d'Ernierung vun der Bevëlkerung, besonnesch, wat dei Äermst an der Bevëlkerung ugeet, a Gefor bréngt? Kann d'Regierung dëst fir all eenzelt Land, wat Bio-Ethanol produzéiert, deen och an d'Lëtzebuenger Versuergungskette kënnt, ausschléissen?**

D'Biokraaftstoffer déi hei zu Lëtzebuerg am Transportsecteur an den Émlaf kommen, müssen d'Nohaltegkeetskrittäre vun der europäescher Direktiv 2018/2001/UE anhalen, déi och an d'nationaalt Recht ëmgemat sinn. Zuelen dass et zu enger disproportionéierter Deierecht komm ass duerch d'Hierstelle vu Bio-Ethanol op Agrarfläche leien eis keng vir, och net fir déi eenzel Länner wou de Bio-Ethanol hierkënnt.

Lëtzebuerg, de 6. Februar 2023

(s.) Claude Turmes  
Minister fir Energie